

## PAS NAMBA TU PAULO MENI TIMOTIRE GAENUA

*Paulo meni Roma nate ena benai sora noko toiro itise duba kapaira be nuso zora awenu giro pas ei awa bua mai nuso Timoti amire gaenua. Timoti nu Efeso dubu amira giti kopi wero noinu giro Paulo meni potai ge eni potiro nu Tuara gera zewai wero nuaise senua.*

1-2 Na Paulo. Na Yesu Kristora aposolo wero nowena ami pas ei awa mai koko nasu Timoti nimore gainona ewa. Anutu meni Kristo Yesura buara nuai me namorekai potamu seroninua, ami emo nu ara tamai nusora na pumuro aposolo potinu nowena awa. Anutu Mama ata Tua nasokai Kristo Yesura nana ena sogawaire awadiaire duba-ozaire semu niso nana niro itaise.

*Timotira nana tuma diai me itisonua.*

<sup>3</sup> Apipie nasu nukare duba daimatare Anutu sou i-tupie dowu mai nusokare nane da ago inowena ami kokopai Anutire asinowena. Na be giti pi waiko isara ni kotupitinoise kokopai nimore towena. <sup>4</sup> Nage ina-dua inoinage ni na emo di sesa amira kotumuro ni noko gosinoise yawa sara bamubake wamu sero yaba inona. <sup>5</sup> Tuma diai me niso nana itia amira awa kotupitinona. Tuma diai awa apie bama Loisto mia niso Yunis nusoto nana itisonua ami niso nana dai itewia awa gosinona. <sup>6</sup> Ami emo na kotumai niso awa-uzero sane. Na wana nasu giti nisora potina Anutu meni bua waira putou nimore potinua,

awa niao moka pisawenakai nina-ninare kei awinowia ago ine bua waira putou niso nana itia awa weyo kei awae. <sup>7</sup> Ago inoise ego kotumuyo: Anutu nu Ozana potitinoise burau wanisekai oko potinua. Putoure dubara dumire duba sienaire dai nuanisekai potinua.

<sup>8</sup> Are ni Tua nasokaira oziga sero kerenameu wero me naire oko wase. Noko na nu emo benai ema nona, amira me naire oko nuase. Ni Anutu meni putou potai amira te namore dai Oziga Ewanana emo inoise yayara tame noiyo. <sup>9</sup> Nune nakai kora wero dubu nuso saramai wanisekai nakai uzumunua. Awa ewanana nasokaira kota, nu nutope ginu itinua, are dumi yagaba nusora namorekai ago wenua awa. Dumi yagaba awa gita me gita zebu kaka tamamure Kristo Yesura buara namorekai pumunua. <sup>10</sup> Ota zeme meni awa Korawai Ema nasokai Kristo Yesu zebura osenu amire dumi yagaba awa kei damu ninua. Nune betaira putou puro osero baitiro nuai me ewanana itai gege itai awa Oziga Ewanana tugata inoise namorekai kereniro poti damu ninua awa.

<sup>11</sup> Are Anutu meni na Oziga Ewananara tugata wai ema, o aposolo, o gipai ema wero nuanise potinu nowena awa. <sup>12</sup> Na ami emo yayara tame nowena awa. Ago inoise me oko nitinowena. Na tuma didinowena numore duba eto oko inowena. Tepo awa. Na ego ine gosinowena: Nu putoure meni bua namore potinua, bua awa te dia inuai be bamu mamunoya awa. <sup>13</sup> Ge ewanana ni gipena, ge ami ebata patasise sai awa gipinoya, are ge da awa ama ganinoise noiyo. Yesu Kristo tuma didinoise dubara dumi pupinoise ge awa ziro baitiro

noiyo. <sup>14</sup> Ozana duba nasokaira nowia ami ni sogawai ge me Anutu meni wana nasokaira potiro dia wanisekai senua, awa saitiro dia wasa niso nana itaise.

*Onesiforora ge.*

<sup>15</sup> Asia provinsra ena dapikarago na doro tepo wewa, awa ninisa awa. Fizeloto Hemozeni nuto dai na dowato awa. <sup>16</sup> Tuara awa-diai Onesiforora dubu amira nana itaise. Mama nusokare meni benai ema namore me kaka namu duba koko waira bua wai gege inoisia. <sup>17</sup> Nu Roma nate kei awero zewai wero na kau inomite tapisia. <sup>18</sup> Tua meni ninai be bamura ena Tuara nana ena awa-diai tamaise. Nu Efeso ena sou bua eto oko wenua, awa nitope gisa awa.

## 2

*Ni Tuara soldia putoure noiyo.*

<sup>1</sup> O ma naso, Kristo Yesu meni dumi yagaba nimore pumunua, awa ni puro noise putoure weyo. <sup>2</sup> Ema dainirora benaura ena ni bua ge sero gipero awena bua ge awa ema eni ge niniro dimai amira nana ge tugata waira putou itia nukare awa gipasa giro nukare ema eni giparise.

<sup>3</sup> Ni Kristo Yesura soldia ewanana noise yaya nimore sai awa te dipinoise noiyo. <sup>4</sup> Zo nu soldia wero nuamunoya ami nogo wero amire tamara bua susu giti awa asumamunoi? Nu giti kopi nuso meni bua nuso gai te waise yaba inowia. <sup>5</sup> Zo nu otao enire saibore sumamu inoise saiborera potai ge ama ganinoise mai eni dainai amire zuma numore potamunora. Ota nu supinoise potai ge dainamunoya, awa zuma numore oko

potamunora. <sup>6</sup> Zo nu nai bua inoise yaya nuso tamamunoya ami ma awa gita naise sai itia. <sup>7</sup> Ge tona awa zazaumuro giyo. Tua nune duba niso ziai zazai amire ge tona amira susu giro baitamunosa.

<sup>8</sup> Ni Yesu Kristo kotupitinoise noiyo. Nu Dawidira sibuna meni betaira ena seka wero erinua. Oziga Ewanana nuso tugata inowena ami ago ine towia. <sup>9</sup> Oziga Ewanana ami emo inoise yaya bamubake tapinowena. Ago wero pasina mai benago wetera itena ewa. Ata Anutura ge awa oko benisera. <sup>10</sup> Are yaya bua dapikarago awa Anutura seronai dubu emo tamuro dipinoise nowena. Nukare namorege dai Kristo Yesura korawaire simai zasimaire itai gege itai awa dai topetarise ago ine inowena. <sup>11</sup> Ge ego ine itia awa me awa,

Betai nusora susumunakai, are nuai nusora da ago ine susumamunonakai.

<sup>12</sup> Yaya tapinoise kaka tamamu ine wamunonakai, awa numore dai ema babezinoma wero dia wai bua wamunonakai.

Nu begi wamunonakai, awa nune da ago nakai begi wamunoya.

<sup>13</sup> Sai zewai wai nasokai betata wamunoya, awa sai zewai wai nuso meni zewai wamunoya. Zo sero zo sero awai awa nuso nana oko itia.

*Gera bua mai Anutu meni gawi ewanana inowia amira ge.*

<sup>14</sup> Dubu niso meni ge tona awa nuwenai azu, kotumai nusokare awa-uzeyo. Ago inoise Anutura giti mokara nukare ge puti eni amira ge oko bawarise se zewai waise. Tani ge puti gege amira ge bawai awa nena ewanana zo oko tapinowia.

Tani ami erama ge bawai ninitinora awa gera wamunoya.

<sup>15</sup> Anutu meni ni gai te waise putoure noise bua niso weyo. Ago inoise ge me susure kere damu nitinoise nuasa ge ami sonero bayai me nai meni bua ema niso nana tame oko witaise. <sup>16</sup> Ota ge puti gege amira gunara ni ge awa tema wero noiyo. Ge puti ami erama Anutura nana ena uzupitinuai ge nuso doro ebata wayara bayamunora. <sup>17</sup> Ge opi sai nusokare awa kaka tema wamu wamunosa, awa ge ami boya eya pauniro bamubake inowia ago ine wero nikare gera wamunoya. Ema ago ine amira nana Haimenioto Failitore. <sup>18</sup> Nuto ge me doro ego towerato awa, “Seka wero erai awa emoko kei awenua.” Ago sawerato ema eni meni tuma diai nusokare besinowera. <sup>19</sup> Ata Anutu meni dubu nuso ibu ine potinua ami zewai wero dopero itewia. Amira tame owe nuso soya bozai ine ego itia, “Tua meni dubu nuso gosinowia.” Noko owe zo ego itia, “Tuara zazo puro nowera nukare dapikarago nuai waya awa azu sarise.”

<sup>20</sup> Ema waure amira sora ena au-tewa golre silvare meni wai awa gege kota, ni menita zebu meni wai awa dai itia. Au-tewa eni awa bayau zuma bamure. Ota eni awa zuma tepo, apaira gegenai awa. <sup>21</sup> Are zo nu ema ebata wayara nowera awa azu sero ebata mera nuamunoya ami au-tewa zuma bamure ine wamunoya. Ago wai sora mama meni nu gawa wero puro noise ami bua kokopai susu giti wamunoya awa.

<sup>22</sup> Mai seka meni nena susu giti amire duba-duba inowera, nuai ago ine awa azu seyo. Ewanana waita tuma diaita dubara dumireta

begare nuai awa niso nana ena zamaise zewai weyo. Awa ema duba nusokare saramai meni Tua arugitinowera numorekare dai ago weyo. <sup>23</sup> Dau geta ge puti toise sero niniro awai awa azu sero musuniyo. Amira me awa ge bawai gege kei awinowia, awa gosinowesa. <sup>24</sup> Tuara bua ema meni ge bawai azu sai itia. Tuara bua ema meni ema dapikarago otao waise. Nu ge be peure gipaise. Numore waya wara ina tini kapaire oko waise. <sup>25</sup> Nu ema ge dai amira kotumai korawamu sero tugata waise. Ago wai duba nusokare kapeteniro ge me giro baitarise Anutu meni ninamunoita? <sup>26</sup> Satan meni ge nuso dimarise geta nusora dimunua, awa kotumai zazero besamunora awa.

### 3

#### *Be pesunitinuai amire pasina zamamunoya.*

<sup>1</sup> Ni ego ine niniyo: Be tepo wamu sero inuai amire yaya-buyaya eure-taure kei awamunoya. <sup>2</sup> Ema ego ine wero nuamunora: Nukare nukare gege kotupitinoise dagia wero nuamunora; nukare wau moni emo duba-duba wamunora; nukare tama puro wititinoise nutopekare bowi wamunora; nukare Tuare ema enire awa sero isimamunora; nukare mia mamera ge damunora; nukare awa ema eni meni numorekare dumi yagaba pumara ina kokopai oko samunora; nukare Tuare emare awa isa-naisa wamunora; <sup>3</sup> nukare dubara dumi tepo; nukare bega tepore, iwo ina-wa wai gege inoise nuamunora; nukare zuzu saire ge busaire nuamunora; nukare tama nusokarera duba-duba wai awa oko puro

osamunora; nukare wo gorobare ine wero nu-  
 amunora; nukare nena kokopai iwo inoise nu-  
 amunora; <sup>4</sup> nukare otao mamai nusokare awa  
 iwora wanera potamunora; nukare ebata wa-  
 yara giti agu nuamunora; nukare opi inoise  
 nutopekare gara ema babezinoma wamunoya;  
 nukare Anutu kota zebura nena ara tapinoise  
 nuamunora; <sup>5</sup> nukare tama meni Tuara ge ninai  
 sao inoise moka nusokare meni gara me amu  
 wamunoya awa. Ago ine awa nuara giro azu sero  
 aike noiyo. <sup>6</sup> Ema dubu tona amira nana eni meni  
 dubu enira nana saitiro baro bama kotumai tepo  
 awa etetenitinerawa. Ema ami bama pasinara  
 mou menita tamara duba-duba wai meni kotumai  
 nusokare sisinowia, nukare awa opi ge nusokare  
 ama ganarise etete nitinerawa awa. <sup>7</sup> Bama ami  
 be giti ge susu giti ninamu inoise ge me susure  
 amira susu oko giro baititinerawa. <sup>8</sup> Gita Zanisto  
 Zambrisre\* nuto Mosera ge azu sewato, ago ine  
 ema tona awa nukare ge me susure awa azu tow-  
 era awa. Kotumai nusokare waya, ata tuma diaira  
 ebata gipinerawa awa opi gege awa. <sup>9</sup> Zanisto  
 Zambrisra opi kei damu ninua, da ago ine opi  
 nusokarera susu kei damu nai ema dapikarago  
 giro tepo wamunora. Are bua nusokarera me oko  
 bamu wamunoya.

*Zewai wero Tuara ge puro nuai amira wini ge.*

<sup>10</sup> Ata nine meni awa te esa naso patiro nowesa.  
 Ni ge tugata wai naso, nuai naso, bua wai naso,  
 tuma diai naso, awa-diai naso, dubara dumi  
 pumai naso, zewai-zawai wai naso, <sup>11</sup> iwora yaya-  
 buyaya naso, amira ebata patitinoise na ama gani-

nowesa. Antiok nateta Aikoniam nateta Listera nate ena na dero kaputiwa yaya borere bamu tamuna awa gosinowesa. Ata Tua meni saineba yaya dapikarago amira soe ena na soenua. <sup>12</sup> Zo nu Kristo Yesura nana deseniro gera ebata patamunoya, awa nuso nana dai iwora yaya kei awamunoya. <sup>13</sup> Ata ema wayata etetenai ema nukare ami ema eni etete nawera ina etete nawera ago wero susauma waya wero baitamunora. <sup>14</sup> Ota nine meni awa ge me susure nimore gipai awa ziro tata-tata inowesa, ge amira deseniro noiyo. Ge ara nana pumusi awa oko kau inosa. <sup>15</sup> Susu ei dai giro baititinowesa awa: Ni mai moruare Tuara ge saramai awa azimuro niniro awi-tupise nowesa. Ge ami duba nasokai zasimai Kristo Yesu tuma didinoise kora wai te tamamunonakai, amira putou awa ge buku saramaira nana itia. <sup>16</sup> Tuara ge gayai dapikarago awa Tuara Ozana meni kereninu gaewa kei awenua awa. Ge ami ge me susure nakai gipinowia, ata potai ge potitinoxia, ata nakai sero kora wero awinowia, ata nakai etutiro nuaira ebata gipinowia. <sup>17</sup> Nakai Anutura ema dubu meni bua kokopai susu giti te wero baitanisekai ge gayaira putou ago ine itewia.

## 4

### *Ni Tuara ge me kerenitinoise noiyo.*

<sup>1</sup> Kristo Yesu noma kei damu niro Tua bamu wamunoya. Ago inoise betaire seka nuaire ge nasokai sai tepo wamunoya. Ami emo na nuso nana giti mokara ata Anutura nana giti mokara sana



niniyo. <sup>2</sup> Ni Tuara ge tugata wero baiti. Ago inoise ema gera yaba wamunorita kaka wamu wamunori, saineba, zewai wero tugata weyo. Ema duba kapetenarise sero ge meni moka nusokare gayase; waya nusokare giro senamunosa; Tuara ebata me patarise awa-uzamunosa. Ago inoise gipai bua niso berea tepo inoise noiyo. <sup>3</sup> Noma be zo mai amire erama ge ewanana ninaira biawa wai giro duamunora. Nukare ge ewanana doro ge ewe zo ninarise wama beregi-beregi wai giro gipai ema eni sianiro pumara ge ewe yaba inowera awa te gipinuamunora. <sup>4</sup> Ago inoise Tuara ge me awa poti gutipe niro opipira uge amira desenamunora. <sup>5</sup> Ata nine meni awa be giti kotumai niso ziyo zewai-zawai wai nuase; yaya-buyaya niso nana tame witai zewai weyo; Oziga Ewanana tugata waira bua inoise noiyo; bua ge nimore sai awa wero baitiyo.

*Paulo bua nuso pesunaira be zora awenua.*

<sup>6</sup> Pris ema zame potai bua nusokare inoise akou ou wainre zo awa zame ine Anuture potamu sero kaka-kaka zozinoma bua pesuniro amire agewa dago zozawera tepo inowia, ago ine nuai naso meni tepo wamu inoise inoya. Utura bayaira be naso zora awinoya. <sup>7</sup> Na saibore me supinoe pesunitinoise Tua meni tani naso potinua amira kei awinona. Oziga Ewanana tugata waira bua namore sai awa wetena te wero baitisia awa. <sup>8</sup> Are ema saramaira giti simaira nena namore asero woi wai itia, awa noma be bamura ena Tua naso nu zas bua me gege wamunoya ami namore potamunoya. Awa namore gege kota, kei awai nusora

yaba inoise nowera numorekare dai potamunoya awa.

*Pesunaira ge.*

<sup>9</sup> Ni awita sero naso nana eya mu. <sup>10</sup> Dimas nu zebura nenara yaba inoise na doro Tesalonika nate bamisia. Kresens nu Galata bamisia, ota Tito nu Dalimesia zebura bamisia. <sup>11-12</sup> Tikikas awa iyetena Efeso nate bamisia. Luka imata namore dai nowia. Mak tamuro sero eroma muwoto. Nu buara te na soremamunoya. <sup>13</sup> Mamu noma giro tama sawai naso Troas nate ena Kapasra sora dotisena, awa puro muyo. Ago wero buku naso pepa meni wai awa pupinoise buku wo tata meni wai awa oko nuwenase. Awa dai dapikarago puro mu. <sup>14</sup> Alesanda nu ema bras meni nena wai ami namore tani waya dainiro wenua, are noma Tua meni amira ina numore potamunoya. <sup>15</sup> Ge nasokare dainiro puro osenua, are ni nitope nu uma wero baitiyo. <sup>16</sup> Koto bua naso gita kei awisia be amire otao zota zo meni gera na oko sorepisia. Tepo awa. Nukare dapikarago na dotisera awa. Pasina nusokare awa Anutu meni oko kotumaise! <sup>17</sup> Ata Tua meni awa nune ge nuso tugata wero pesunana ema Yudako dapikarago nukare niniro tepo warise naso nana muro na soga wero zi zewai wero ge tugata wetena ninisera. Ago inoise wo layonra bera ena na soero pupisia awa. <sup>18</sup> Tua nu na nena waya bamubamu dapikarago amira nana ena soero pumuro utura mokara potamunoya. <sup>19</sup> Na Priska ata Akuila ata Onesiforora mai awiso nukare arenitinona, awa se gare. <sup>20</sup> Erasto nu Korinti nate ena dona itewia. Ata Trofimo nu yaya pumunu giro Mailitas nate

ena dona itewia awa. <sup>21</sup> Ni ewa eraira be kaka mamure eya muyo. Yubulas meni ni arenitinoya. Ota Pudén ata Lainas ata Klodia ata otao mamai dapikarago nukare da ago nima arenitinora.

<sup>22</sup> Tua meni ititi nisore dai nuaise. Tuara sogawai meni nisokare nana itaise.

**TUA YESU KRISTORA OZIGA EWANANA**  
**The New Testament in the Suena Language of Papua**  
**New Guinea**  
**Nupela Testamen long tokples Suena long Niugini**

copyright © 1978, 2011 Wycliffe Bible Translators, Inc.

Language: Suena

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 22 Feb 2024 from source files dated 31 Aug 2023

37ac8ca1-3e79-506f-922b-bda1a01d9a50